



2 de decembro de 2010. A resolución do **concurso eólico** trouxo non poucas sorpresas, non tanto relacionadas co reparto dos Mw (GN-Fenosa, tabeiróns da especulación enerxética e empresas amigas), como cos "proxectos asociados", quer a

planta de tratamento de refugallos

que apresentou Estela Eólica. Precisamente, un dos maiores problemas do novo Plano de Residuos é ubicar esta "SOGAMA do sur" e conquistar o financiamento privado para a incineradora (230 millóns de €), a metade de todo custo do PXRUG. Máis á vista dos resultados do concurso eólico, a Xunta resolve dun "decretazo" dous problemas:

financiar a incineradora do sur

(Estela Eólica estaría obrigada a facela a cambio dos Mw e non podería capitalizar o investimento) saltándose o concurso público para a adxudicación da infraestrutura e

privatizar definitivamente a xestión dos RSUs

, un

[negocio ruinoso para a Xunta](#)

.

A folla de ruta do novo PXRUG ten outra fita este mes de decembro. Segundo o conselleiro Hernández, o plano estará aprobado denantes de fin de ano e deberá ter en conta a proposta de infraestrutura de "tratamento" presentada por Estela Eólica, que estará con toda seguridade baseada na **incineración**.

A este respecto, na estratexia da Xunta hai dúas importantes **eivas**. A primeira, a derivada da **conflitividade social**

e conseguinte erosión eleitoral (municipais en 2011) que seguramente provocará unha incineradora para 900.000 Tm ano no sur de Galiza. E a segunda é a

temporalización

: a incineradora prevese que esté operativa en 2014, mais tendo en conta que a construción -supoñendo que a licitación sexa en 2011- demorarase uns 2-3 anos, que a empresa quererá ingresar algún rendemento polos seus novos parques eólicos denantes de desembolsar 230 millóns de €, e que en 2013 hai eleccións galegas, o máis probábel é que non chegue a construírse en prazo.

Á Xunta tanto lle ten: dispón dun "colchón" de 2-3 anos, alongábel a discreción, logo da recente ampliación do vertedoiro da Areosa, en Cerceda, no que seguir amoreando lixo sen tratar durante o tempo que faga falla. A Xunta de Feijóo so quere cumprir o expediente fronte a

Europa, dándose por satisfeita co "recrecido" do vertedoiro: máis lixo enriba do lixo, e tiramos até as eleccións de 2013.

Por iso, tanto as infraestruturas do propio PXRUG como os investimentos vencellados á resolución do concurso eólico son virtuais: os primeiros non se chegarán a executar nesta lexislatura, e os segundos nunca o farán. Aí están os ridículos investimentos asociados ao desenvolvemento eólico durante a era Fraga. Básicamente as empresas adicáronse a aplicar a estratexia de "colle os cartos e corre", fuxindo dos seus compromisos de crear postos de traballo através de planos industriais asociados (ver o estudo do economista da U. de Vigo Xabier Simón " [Plans eólicos empresariais no sector eólico galego](#) ").



Con estas novas adxudicacións nada nos fai pensar que acontecerá algo diferente. Ao obxectivo heroico de crear **13266 postos de traballo** que segundo o conselleiro de Industria traerá da man o reparto eólico, haille que aplicar o correctivo da realidade. E os datos apuntan a que no país, os postos de traballo criados polo sector eólico (aos que hoxe hai que restar os 268 empregos perdidos polo peche da fatoria de GAMESA n'As Somozas), son ben distintos das entusiastas previsións feitas polo conselleiro. Nunha recente tese de doutoramento, ["Xénese e desenvolvemento do sector eólico en Galicia \(1995-2010\): marco institucional, aspectos económicos e efectos ambientais"](#) elaborada na USC por Rosa María Regueiro Ferreira baixo a dirección do Prof. Xoán Doldán, ex-director do INEGA, apóntase que

"para o período 1995-2009 para Galicia, as actividades de operación e mantemento xeraron un mínimo de 417 empregos e un máximo de 633 de tipo neto. [] Para o mesmo período, e en relación a s actividades de construción do parque eólico, as cifras oscilaban entre 8.555 e 10.281 empregos, que consideráramos brutos, dado o gran nivel de rotación existente neste tipo de actividades."

O concurso eólico é portanto outro **instrumento de propaganda** (con incineradora apegada) ao servizo da Xunta para camuflar a enaxenación dos nosos recursos naturais aos tabeiróns da especulación enerxética. Trátase simplemente de privatizar o vento e os refugallos coartando calquera posibilidade de desenvolvemento socialmente xusto e ambientalmente sustentábel.